

# The Makuilongdi Express


Liangmai Daily Newspaper

"Mazibo niu ngamne"



Giorgia Meloni niu thainai mien Italy gu prime Minister leng election kambo ga ngamjiu Italy ga raithubo maipuimai Prime Minister phung mide. Pahai Brothers of Italy gu party gasu kiulu bo-e.

Congress gu leader Jitendra Solanki niu Gujarat high court ga Shah Rukh Khan tu case file thiukhai bosi maji makge chiujiu reject thiu mide. Vadora railway station ga 2017 kum Shah Rukh Khan niu film kep bambo wanga maikhat heart attract thiujui saibo don niu we



Zengtung 27 N-genhiu 2022 Machanai Chiang PO Tamei, Tamenglong Dist. Manipur Vol.01. Issue 6 Page 1

Sichiujiu maikhat kumbo niu kasabo ninang gasu paronna kam masan lusai patu kakung boga thinpiu khaine. 11 Timothy 2:21.

**Zou jon suira Cabinete niu chapkhai mibosi n-de de bamdi kalan silak mide.**

**Imp. N-gen. 26.** Manipur ga Manipur State Cabinete niu Zou hai pabam kasiaga jon suira lekhai botu tam-tambo Civil Societies Organisations dungniu suilakgesise kalan lan milo chiujiu tanjiu dinbam boga n-danai CAF and PHED Minister Leishangthem SUsindro meitei niu dinjiu sibo ladbam hai wadi kalan lan lak mide palamra haibo chamsui lubo hai kapat kangut phui mawi lujiu chamsui khai mibo-e chiujiu dinne. Paniu dinjiu changam hai houra jengniu state government niu raiboga zou taliubo mania 10 luraira raye chiu lujiu Kabui jat leng nia, Andro, Phaiyeng, Khurkhul, kahtdi Sekmai leng nia nia jam jankhai raye chiujiu dinne.



Source The Hindu

Russia gu School khatga palun simak mainiu chaganmi niu kepjiu 15 shai mide khatdi 24 niu ajam me chiujiu dinne. Chamai khang 15 shaibo gasi nahmai chamai 11 khat shaijou we chiu jiu tacham ga dinne.

**N-danai Tamenglong district HQ ga Delimitation of District Council Constituencies (DCC) Tamenglong nai Noney district gu makhiam khai mide.**



Correspondent

**TME. N-gen. 26.** Old deputy Commissioner Office Tamenglong gu Confrence Hall ga n-danai Dinganglung Gangmei (Retd. IAS), HAC niu bampi lulujiu Tamenglong nai Noney District gu Delimitation of District Council Constituencies lamga Culsultative Meeting tatkiu khai mide. Haibo makhiam ga Janghiamlung Panmei, MLA Tamenglong, Thangboi Gangte, Kachamthai Faiga Gangmei ADM TML, CEO Tamenglong, Namlalung Gangmei SDO Nungba, Pual Nungsha SDO tousem, SDO Noney

khatdi tamtambo political parties dung, District Level Officers (DLOs) chijiui wangjiu padam lukhai mide chiujiu dinne. Madui gasi District Council pajat tamtamjiu bamdi representative hai nchamjiu njan chamjiu janra chiujiu chapkhai mide. Karai masuangra District Council Constituencies hai Tamenglong nai Noney niagu thiujui 24 ronnang bamniu boi chiudi thainai mien hai Tamenglong leng 24 khatdi Noney leng 24 chiujiu kakhak misune chiu bam mine.

**Tamenglong to Mahur National Highway chuwangboga niabo namdung niu land compensation kheng mide.**

TMB. Imphal

**N-gen. 26.** Tuhoi Tamenglong gasu Mahur tangrabo Natioanal Highway chujiu bambo ga namnam gu charam chu masa mibo khatdi alin tara, chaki chalu chulai mibo charam ppaodung niu Chief Minister N. Biren khuga memorandum pikhai mide chiujiu dinne. Affected Land and Prop

erty Owner's Association gu president ID Gambui niu n-danai Manipur Press Club ga dinjiu, n-pui kapha taliu wang khaibi bo tura welcome thiuwe chiudi changam kamjiu bambo dung niu kamkiu bambo hai tuhoi alin tamra, kaphung charam khatdi khourui khouna waji tu kam cond. P.2

**Pakistan Army helicopter balochistan ga crash kamjiu chamai khang 6 shai mide.**

**Pakistan. N-gen 26.** N-danai Harnai Balochistan, Pakistan ga Army officials chamai khang charok tu phungkinbo helicopter hai crash thiubo jengniu sibo helicopter ga tuangkinbo mathiusi shai mide chiujiu tachamga dinne. Sibo helicopter gasi major khangnia di shaijou mide chiujiu Pakistan's Inter-Services Public Relations (ISPR) gu tacham ga dinne. Pakistan gu Prime MInister Shehbaz Sharif niudi Twitter ga palung makbo cham shaimibo kikhun leng tacham langkai jiu nation pakhiang nang kikhun gu chariubo padam phung ncham bamme chiujiu roukhai mide. Sibo helicopter hai 'Flying Mission' kambambo wanga su crash thiubo-e, n-de gu kasoibo niu lo chiubo tuhoi katangra maida palam silu makha ye. Haisiniu chahiu khatnia kakga paniabo thiujui crash thiubo-e chiujiu dinne.

## Karingting Lunlung



@@@Thaikum July-August ga haichiu tingsa sumah chiubi thaiting niu tingsa jiu alung niuwe

### UM! Apui nai apiu thainai asai biura chalu mengmi choihoi brabu!


Chakhiu chalan tu luni  
jujuu nagu kawibo  
lunlung tu jonmi dulo

Editorial

**Chapon**

Aliu Liangmai ponna lengdi chara phibang gasu lungkum jiu charani maigu suangdi palun pagiak kawibo pikhai jiu bam me. Aliu poupe mainiu sisitu ri mawijiu ribo jengniu tuhoi ken katang thinpiu bambo-e. Apou Ape mainiu chapon piubo haidi patu pakhai siju thinpiu we khatdi pawan siju thinpiu bamniu we chiuwe. Chiudi aliu Liangmai leng pikhai bibo chapon tu tuhoi ken ga lungbam maidung lukhai lak miji mah pachun ning-ning thiujuu compose thiujuu kam karen miji tuhoira n-de piuse aliu poupe niu thinpiu bamniubo masnbo aliu Liangmai ponlo chiubo si npek lulakbo di keng mide. Pasai jat khaisai aliugu masanbo chapon tania tu mainiu asut lubo nai aliu ngang hajiutalune. Aponsi apon jut-jut khe, aisi ai jut-jut khe. Kali makeng jujuu khatdi kahabo wang doulune, makum mawi sui lujuu apon ra patun pakhai pawan siju lungkhe.

**Chalen khuga bambo parik kumbo New Covid phiupat mide.**



Nagaland Post

**N-gen.26:** Covid rapot kasan bo SARS-Co V-2 Virus hai Rusia gu chalen khuga su douwe, haibo virus hai chamai natu kam masa kasuibo khatdi tuhoi taliu padjiu bambo COVID-19 gu chapiu tu atung ngambo rikge chiujuu dinne. USA ga bambo Washington State University gu researchers team niu phiupatjiu sibo rikjan leng Khosta-2 chiujuu mathak khai mide.

**Watheng makbo lung ga Imphal nai Bangkok kakga flight service bam misune. CM Biren**



**Imp. N-gen. 26.**

Chief Minister N. Biren Singh niu Flybig Flight Imphal nai Tezu kakga lamarabo Flight hai Bir Tikendrajit International Airport ga n-danai Mennai inuagurate thiukhai mide. Sibomaduiga panitacham dinjiu Prime Minister Narendra Modi niu macham khaijiu bambo UDAN Scheme hang gasu tuhoi state dung khatniukhat tu mana jiu bam mirakhatdi aliu North East state dung hai khat khat tu alam widiang lura jeng niu we. Haibo Flybig flight hai Imphal gasu direct Tezu

Arunachal Pradesh ga tadmeng tang sune chiu lujuu Guwahati chiujuu tadraye chiujuu dinne. Imphal nai Bangkok gu Flight service lamga paniu dinjiu watheng makjiu sisidi tadsu hou misune chiudi pawan kadak bamkha ye palamra chamai wandi n-dechiu siak ralo chiubo phuijiu bambo-e. Sibomaduiga Works Minister Govindas Konthoujam nai Transport Minister Kashim Vashum di wangjiu padam lucham khai mide chiujuu dinne.

condt. from p. 2  
**Tamenglong to Mahur National Highway**

mahajiu wajeng thiumak jiu bambo hai wajiu kha n-chum mibo-e. Siniu government niudi sise

phuilu kalan khai lanlo chiujuu memorandum pikhai mibo we. Kam masa mibo alin tara maksai tam-tambo gu hai n-deziu siaklo chiubora khot masan siak lu makhaye chiujuu dinne.

**Rajasthan ga CM don niu chalad loikiu lakjiu bamme**



The Hindu

**N-gen.26:** Rajasthan gu state ga tuhoi Chief Minister phungbambo Ashok Gehlot tu Indian National Congress gu papi leng kadabo ga phungkhang mira khatdi pamalin ga Sachin Pilot tu kada khaira chiujuu kambo tu CM Gehlot sai kasui maidung suilakge chusai paliura paliu bam npatmi raye chiujuu atung bambo jengniu observers leng langkhaibo Mallikarjun Kharge nai Ajay Maken tu karoubo che thiujuu pira din mide. Panai tuhai Jaipur ga tadlujuu Congress Legislative Party (CLP) tu majang lujuu Gehlot malinga soutu khairalo chiubo phuiralangkhaibo-e. Sachin niu CM phungsai paliu ra jou lakde chiujuu MLA 90 san Speaker C.P Joshi khuga resignation pilujiu camp thiujuu bam mibowe. Party ga bammai kakeng niu chalung man makjiu haisi niu BJP gu party leng n-pui lekhai bambo we chiujuu dinjiu bam mide.

**Mathen Cham**



UEFA Nation League gu Trophy Thaiting UEFA Nation League Mathenjiu bambo ga Croatia nai Netherland ra semifinal ga nguttang jiu bam mide.

**INVITATION**

**DISTRICT INDUSTRIES CENTRE  
TAMENGLONG**

CORDIALLY INVITES YOUR KIND PRESENCE  
AT ONE DAY AWARENESS PROGRAM  
UNDER THE SPONSORSHIP OF KVIC, IMPHAL

To  
ORGANIZED DISTRICT LEVEL AWARENESS PROGRAMME (DLAP)  
& DISTRICT LEVEL MONITORING COMMITTEE (DLMC) MEETING UNDER  
PMEGP FOR THE FINANCIAL YEAR 2022-23 TO BE HELD ON WEDNESDAY  
THE 28<sup>TH</sup> SEPTEMBER 2022.

Shekinuh-In Conference Hall  
Tamenglong HQ

**Chief Guest**  
Thangboi Gangte Mcs  
ADM TAMENGLONG

**Guest Of Honours**  
A.S.S. DEWAN, Director, KVIC Imphal  
W. BIRENDRA LDM, TAMENGLONG  
MOSES GONMEI CHAIRMAN KHOUPILONG  
TH. EBOMCHA SINGH, CEO, MKVIB Imphal

**President**  
P. MUNAL SINGH  
General Manager, DIC, Noney & Tamenglong

WILL GRACE THE FUNCTION RESPECTIVELY

RSVP: GENERAL MANAGER DIC, NONEY & TAMENGLONG  
8974893823